

## KORINT DILAG NAI 2 PAULUS YOM

### *PAULUS NUG KAYAKNU ENA HEME AUM*

<sup>1</sup> Da Paulus amu Kayak Nug nuka da total danab meide, da Kristus Jesusnu total danab daatem. Da ig lainig Timotius ele i ad udug imu yaatep amu i ag danab ah Kayaknu kristen tamaniak Korint daateb ahilagnu amu Kayaknu danab ah oh Grik wanpa apa daateb amu oh dilagnu ele yaatep. <sup>2</sup> Ig Mamenig Kayak amu Nadi Jesus Kristus ele, ahilah ehanitak okai hamu megtep amu ahilah madod ele ahilagpa daaglahnu oonih daate.

<sup>3</sup> Ig Kayak binag humatu! Nug am Kayak ihinig, Nadi Jesus Kristus Mameg. Nug am oo gai iita doyak kobol diig. Nug danab oh ag ug ele daateb amu Nug he, ag oolag madod mete. <sup>4</sup> Ug oh ihinigpa bete, Nug he, ig oonig madod mete. Anam amunu ig danab ug diigdiig ele dooteb amu, ig heput, ag oolag madod mekunu elele daatem. <sup>5</sup> Adinu? Kristus Nug guitak nadi mawom, amubia ig ele amu maotem, anamib Kristusnu oo madod okai amu ig oonigpa am ba, laa ehanadkunignu leta nete. <sup>6</sup> Am haen ig ug maotem ele amu, ug mawak amunu diig am ag Korint ag ig amu maotem anidna, ehanitak aona, ag oolag madod meeb, Kayak Nug ele laipu daaglag. Aria haen Kayak Nug he, ig oonig madod mete amu, haen amupa ag ele ag oolag madod me, ag ahan elele daanna, ug ig maotem bia ag oolag madod elepa maoglagnu gagatag aoteb. <sup>7</sup> Amu ig ag ena

daaglagnu oonigpa genab gagatag dootem. Adinu? Ag ig ele oh guitak maotem anam bia ele ag ig ele oh oo madod laipu aotem.

<sup>8</sup> O lailad, ag imu dooglagnu oonig daate. Asia taliliakpa ihinigpa ug beum amu ug amu okainab, ig tonika, gagatag ihinig oh editom. Ig anam anidta, dab mak ihinigpa amu ig, “Geha ig mauhkunig,” anam doomut. <sup>9</sup> Genabnab, ig ug doota, “Ig mauhkunig,” amut amge anam beumnu diig am ig ika ihinig gagatag am ii dab memata, ig Kayaknu gagatag dab mekunignu beum. Nug danab mauhpig amu heeb, ag edun hipaidkulagnu Kayak. <sup>10-11</sup> Ig mauhkunignab doomut amge Kayak Nug ig edua awikom, gemu ele anamib ehanigte. Ag ahilag unuqitakpa ehanigpeg, Kayak Nug geha ig edua awikeb, ig ena daagnignu nuhignu oonigpa genab dootem. Anam hepeg amu geha danab ah kudum laa ag ele unuqidpeg, Kayak Nug ig ehanikeb, aria geha danab ah kudum ag ihinignu dab menana, Kayak Nug keeke hete amunu Nug amegpa, “Ena heme,” aon akulag.

### *PAULUS NUG KORINT DANAB II HAM BUPUALATOM*

<sup>12</sup> Aria ig ika amu keeke laipunu am binanig metem. Ihinig ulum oonigpa daate amu ele keeke amuam genab ipunigte. Keeke amuam inam. Ig wanpa oitem amu ig Kayaknu opia awak kobol amu nuhig ham bupuak iita kobol ele aot oitem. Ig danab dab makpa ii hetem. Iita. Ig Kayaknu ehanitak okai, hamu megte, amupa hetata amu ig ag Korint daateb ele amu, ag oolagpa huana hemut. <sup>13-14</sup> Ig nai laa ii yaatem. Iita. Nai ag

eb qena, diig dooglagnu elele amuib ig yaata, ag gemu nai amu laihib dooteb ele amu, ag geha nai amu diignab dooglagnu ool ele daate. Ag anam hekulagnu diig amu Nadi Jesusnu dedpa ag ihinignu oolag gamag ahebeb, ig ahilagnu ele anamib doognig. <sup>15</sup> Da ag ahilag dab mak dahilnu am enaib oolpa genab doye, ag ehanitak adit aoglagnu amu da ahilagpa haen adit gokulnu dab memi. <sup>16</sup> Da inam dab memi. Da ahilagpa tatam ukena, da ag uuateen, Makedonia ukoya, geha da Makedonia uuate edue, ag gumate gopi, ag da meidpeg, Juda gokulnu dab memi. <sup>17</sup> Da anam hekulnu dab memi amge anam ii beum amunu da odelpa nai eduak eduak hamu maditemte? O da nai keeke hekulnu atem amu da hamu naiibtai, wanpan danab nai ateb amubia amu da, "Ao," o "Iita," hamu maditemte? Anam iitanab. Da nai oh genabib atem.

<sup>18</sup> Kayak Nug adi keeke hekunu ate amu Nug genab hete amubia genab ig nai oh ag amelagpa atem amu ig ao, iita ele, nai adit amu oh ou aqata ii maditem. <sup>19</sup> Adinu? Silas, Timotius amu da ele ig ag oolagpa nai mehuqmut amu, nai amuam Kayak Beqa, Jesus Kristusnu nai. Amu ag dooteb, Kristus Nug ao amu iita ele ii ou aqatom. Iita. Kristus nuhigpa amu nai aoib daate. <sup>20</sup> Ao, Kayak Nug keeke oh hekunu nai qaka aum amu Kristus nuhigpa nai amu oh meu bekunu, "Ao," awa ate. Nug anam hetenu diig amu ig Kristus onigpaib nai amu genab atata, nai amupa ig Kayak binag metem. <sup>21</sup> Amu Kayak Nug, ig ag ele gagatag megeke, ig oh Kristusnu danab

gagatag daatem. Kayak Nug ig tituanika, <sup>22</sup> Nug ig nuhignab daatemnu eponak keeke nuhig amu ele ihinigpa mewowa, ig keeke Nug megakun babaitom amu genab aognignu amu doognignu, Nug nuhig Oudi, hapin paniak bia, ig oonigpa meum.

<sup>23</sup> Da ham bupualadtem dayeb amu aria Kayak Nug dahil ham bupuak amu heeb, miag atiku. Amge iita. Da nai genabib atem, da ag ug madakulnu ool ii daye, da paha ahilagpa, Korint apa ii gomi. <sup>24</sup> Ag ahilag oopa genab doyakpa ahan gagatag daateb amunu ig ahilag oopa genab doyak gumagnignu ii hetem. Iita. Ig ag ele udat hetem amu ahilag gamag ahak amu miag atiak daakunu hetem.

## 2

### *AG DANAB EHED HEUMNU HIPUNIN UHUQNA METAGLAG*

<sup>1</sup> Amunu da edue, ag gumate uke, nai dahilpa baula guitak madapi, ag oolag ug daamanu dab memi. <sup>2</sup> Adinu? Da ag oolagpa ug madapi amu aria laa nug da oo gamag ahak medakunu iita! Ag aka! <sup>3</sup> Da nai matu ahilagnu yaami amu da diig imunu yaami. Ag da oo gamag ahak medaglagnu daateb amge da uken, ag ug laala ii bapaidpig antena, oolpa ug doopanu yaami. Da ahilagnu amu da ag ele ag da adi kobol tutuku hekulagnu oo gamag ahak dootem amu ag ele amunu oolag gamag ahakunu genab doomi. <sup>4</sup> Da anuka ahilag ad udugpa nai ug ele yaami, haen amupa amu da ahilagnu ool ug okai guitak ele doyeye amu da huanak ele gaami. Am da ad udug yaami amupa

da ag oolag ug medakulnu ii yaami. Iita, da ad udug yaami amu ag da ahilag nu ool mauhte amu dooglag nu yaami.

<sup>5</sup> Danab aun nug he, ug beum amu nug da ug ii medom. Nug ag ug matom amge da nug ehed nab doomanu amu da ag oh ug matom ii atem. Iita. Nug am ag oh oolag pan laib laib ag aaku oolag ug matom. <sup>6</sup> Danab kudum ag nob nau danab amu medapig, amuam aaku elele. Ag aib baubau huanak nab medapig. <sup>7</sup> Amunu ug naunab danab amu tonamanu, ag anam hak amu uuna, oo mak kobol hena, ag nuhig hipunin amu unuqna metona, ag hepeg, nug oo madod ele daaku. <sup>8</sup> Ug nuhigpa anam bemanu, da ahilag oo mauhak nuhig nu amu ag nug ipunid kulag nu unuqadtem. <sup>9</sup> Da ad udug anuka yaami amu da ahilag kobol atemunab, da ag amelagpa nai keeke ohnu ain ipuanadtem amu ag nai amu dim lamidtebte o iitate, amu da dookulnu yaami. <sup>10-11</sup> Ag danab laanu hipunin uhuqna medateb amu aria da ele hipunin amu uhuqen medatem. Amu hipunin laa da uhuqen medakulnu dayomtai o iita ii dayomtai amge anam dayom dayeb, da uhuqen metami ele amu, da Satan, nug ig bubuika edigmanu, ag ehanadkulnu, Kristus noobpa hipunin amu uhuqen metami. Satan nug ig ib diigdiigpa ig edigkunu hete ele amu, ig amunu kaaka ii daatem.

### *TROAS APA PAULUS NUG OO UG ANTOM*

<sup>12</sup> Anuka da Kristusnu Nai Ena mehuqkulnu Troas tei, Nadi Nug dahil ib amu od matulom <sup>13</sup> amge da ool madod ele ii daami. Adinu? Da layal

Titus da nug ii anidmi amunu da Troas danab uuate, da uke, Makedonia temi.

*KAYAKNU GAGATAGPA TOTOLAG BAN EDIDTEB*

<sup>14</sup> Am gemu da Kayak amegpa, “Ena heme,” awe atem. Nug ig ehanikeke amu ig Kristusnu gagatagpa ban edidtata, Kayak nai mehuqutut, danab ag nuhignu aaku dooteb. Doyak amuam mutudig enanag aben ohpa gote amubia hete. <sup>15</sup> Adinu? Danab laa nug ad udug mutudig enanag ele edipa me, mutudig ote amubia, ig Kayak noobpa Kristusnu mutudig enanag daatta, danab Kayak edua diiom, ag padal mekulagnu ii oiteb amu danab ag oolagpa genab ii dooteb, padal mekulagnu oiteb ele amu, ahilagpa ele ig mutudinig, Kristusnu mutudig bia dooteb. Amge ag oh ahilagpa amu ig mutudig laipu bia ii daatem. Iita. <sup>16</sup> Danab laala ag Kayaknu oolagpa genab ii dooteb ele amu ag am mutudig ena ote amubia ii dooteb, ag ehed, mauhak bedak udig ote anam bia dooteb amge danab ag oolagpa genab doona, padal ii mananu oiteb amu ag am mutudig ena ote amubia dooteb, ag am bau dayak mutudig dooteb. Ig anam bia daatem amge aun nug udat anam hekunu elele? Ig oh am elele iita. <sup>17</sup> Danab kudum laa ag aben ohpa gona, Kayak naipa men dodonu udat heteb ele amu ig amubia iita. Iita! Ig udat imu Kayak nuhigpa aomut amu ig Kayaknu udat amupa ham bupyak ii hetem. Iita. Ig tutukunab heut gote. Ig Kristusnu udat danab daatta, ig Kayak noobpa nai amu mehuqtem.

### 3

#### *TITUANAK BAUNU UDAT DANAB*

<sup>1</sup> Nai imupa ig baula ag ig dooigkulag<sup>u</sup> he<sup>te</sup>m bia doo<sup>te</sup>bte? O i<sup>i</sup>ta ag Korint danab ag ig dooigkulag<sup>u</sup>, danab laala he<sup>te</sup>b amubia, danab laa ag ihinignu ad u<sup>u</sup>dug laa yaapeg matagnigte? O i<sup>i</sup>ta ag Korint ag ihinignu ad u<sup>u</sup>dug amubia laa yaaglagte? Amu oh i<sup>i</sup>ta. <sup>2</sup> Am danab laala ag ig dooigkulag<sup>u</sup> u<sup>u</sup>dug yak amuam ag Korintib aaku. U<sup>u</sup>dug yak amuam ad u<sup>u</sup>dugpa ii yaamut. I<sup>i</sup>ta. Kristus Nug ig oonigpa ye, danab oh eb qekulag<sup>u</sup> daate. <sup>3</sup> Danab oh ag Kristus Nug nuka ad u<sup>u</sup>dug amu yom anid<sup>te</sup>b. Nug ya meke, ig aot o<sup>o</sup>tem. Nug gaupa, men mahapa, ii yom. I<sup>i</sup>ta. Nug Kayak Oudi<sup>pa</sup> danab oolagpa yom.

<sup>4</sup> Ig anam genab doo<sup>te</sup>mmu diig am Kayak. Nug he, Kristus anam ipunike, ig nai amu yaamut. <sup>5</sup> Genabnab ig i<sup>i</sup>kaib udat imu hek<sup>u</sup>nignu amu elele i<sup>i</sup>ta. Keeke anam daate amunu ig i<sup>i</sup>ka keeke laa hemut amunu ii amata. I<sup>i</sup>ta. Kayak Nug nuka he, ig udat imu hek<sup>u</sup>nignu elele daate<sup>m</sup>. <sup>6</sup> Kayak Nug he, ig elele daata amu ig tituanak baunu udat danab daate<sup>m</sup>. Tituanak bau imu amu nuhig do nai yak laa i<sup>i</sup>ta. I<sup>i</sup>ta. Nug am Kayak Oudi<sup>nu</sup> keeke. Do nai yak amuam danab qe mauhte amge Kayak Oudi Nug am danab bau ena daaku<sup>nu</sup> keeke medate.

#### *TITUANAK BAU AMENANAG*

<sup>7</sup> Kayak Nug do nai amu men mahapa ya, Moses epegpa me awom, do nai amu ig oh dim lamidk<sup>u</sup>nignu am elele i<sup>i</sup>ta. Amunu do nai nuhig udat amu ig ihinig hipuninnu oonig ii eduebeb am ig mauhta padal mek<sup>u</sup>nignu daate. Amge Kayak

Nug do nai amu he, amahlak nuhig nadinab amu ba, Moses idupa amahlele, Israel ag nug idupa neegkulagnu elele iita daapig. Moses nug do nai matia male, dimpa amu Kayaknu amahlak nug idupa amu aaku iita meum. <sup>8</sup> Donu amahlak am okainab amge Kayak Nug danab ah nuhig Oudi madakunu heum, tituanak amuam tituanak alag amu edidte, amahlak nuhig am amahlaknab. <sup>9</sup> Adinu? Am do nai, nuhig udat amu nug ig epedika amenigpa padal mekunignu ate amge nug am Kayaknu amahlak ele. Anam daate amunu tituanak bau, nug danab ehanate, bauklel daateb, amuam amahlak nadinab iitate? <sup>10</sup> Amahlak nug anuka amahlom ele amu amahlak dimnu bia iita. Dimnu amahlak amu nug editaknab. Nuhig amahlak am okai, amahlaknab, aben ohpa amahalkunu elele. <sup>11</sup> Keeke haen tutuib daakunu beum amu nug am Kayaknu amahlak ele beum. Amunu keeke hanhan daakunu beum ele, amuam amahlaknab. Nug Kayaknu amahlaknab ele.

<sup>12</sup> Ig tituanak baupa ehanitak aognignu oonigpa genabnab dootem, ig amahlaknab amu ameg metem amunu ig ii badatem. <sup>13</sup> Moses heum bia amu ig ii hetem. Nug lamem qati tepu iitapa idu hautom amunu Israel ag idupa amahlak amu ii anidpepeg, uka iita mekunu anam heum. <sup>14</sup> Amge Israel danab ag dab mak ahilagpa ag tituanak alagnu, ag amu tutuku oolag ii maidte. Anukanu udie gemu ele anam. Ag haen oh tituanak alagnu yak amu ag eb qeteb amge ag amu ii dooteb. Idulagpa lamem qati hautak amubia ina daate. Ag ii aoteb. Iita. Danab nug Kristusnu oopa genab



dootē dayeb amu Kayak Nug lamēn amu uhuqtē. <sup>15</sup> Ao, Israel ag gemu ele hanhan Mosesnu dō nai eb qenana, ag oolag ii maidtē, lamēn qatī ag oolag hautak bia aaku daatē. <sup>16</sup> Amge danab nug oo edue, Nadi oo medatē amu aria Kayak Nug lamēn amu uhuqtē, nug oo aaku maidtē. <sup>17</sup> Nadi Nug am Oudi daatē amunu aria Nadinu Oudi Nug danab laa topa daatē amu keeke laa danab amu ada ii mani guidma. Iita, hamu elele enaib daaku. <sup>18</sup> Amu keeke laa ig idunig ii haut-te, Nadinu amahlak ena ihinigpa udiaya, aam ameg letodpa ya danab idupa yaate amubia ihinigpanu ugeke, hanhan ig amahlak huanak aotem amunu amupa Nug ig baolikeke amu ig Nadi Nug bia edut daatem. Nadi nug am Oudi amu Nug anam aaku hetē.

## 4

### *PAULUS DANAB AH AMAHLAK MATOM*

<sup>1</sup> Kayak Nug ihinignu oo gai iita doya, udat imu ig mekom amunu ig oonigpa bahi yak ii dootem. <sup>2</sup> Iita. Ig kobol uda nak ele, laa lokumakpa heteb amu, ig kobol amu di metota, ham bupauak kobolpa ele ig ii oitem. Am ig Kayak nainu ele amu ig baolita ii hetem. Iita. Ig Nai Ena amu tutuku miag mehuqtut, danab oh ag doon, oolagpa hetodikegeg, Kayak noobpa udat imu hetem. <sup>3</sup> Amge Nai Ena ig mehuqtem ele imu, nug lokumak daatē dayeb amu danab ag padal mekulagnu oiteb ele, ag amelagpaib amu lokumak daatē. <sup>4</sup> Danab amu ag Jesusnu oolagpa genab ii dooteb. Adinu? Satan, nug wan imunu

kayak ham bupuak daate, nug ag dab mak aomnanu ib oo neum. Nug anam heum amunu ag Kristus, Nug am genab Kayak, nuhignu Nai Ena amunu amahlak ii anidteb. <sup>5-6</sup> Anuka Kayak Nug aum. “Gatatu oopa amahlak amu amahlad!” awa aum. Kayak anam aum amu Nug ele he, ig Jesus idupa Kayak binag okainab, amahlak okai bia, anidta dootem amunu ig ika ihinignu nai ii mehuqtem. Iita. Ig Kristus Jesus, Nug am Nadi daate, anam mehuqtata, Jesusnu nai dim lamidtem amupa amu ig ahilag udat hak nid daatemnu ele mehuqtem.

<sup>7</sup> Ig Kayak binag okainab elenu doyak aomut amge ig am danabib, ig wa wanpa hak amubia, keeke ena amu aot, laa oh ag gagatag okainu diig am Kayak, ig iita, amu dooglagnu daatem. <sup>8</sup> Aben ohpa ug amu ihinigpa bete amge ig amupa neta qeta autanab ii aotem. Adinu keeke laala ihinigpa bete amu ig oonig ii maidte amge ig amunu bag qetak ii dootem. <sup>9</sup> Am danab nau ag, ig iita mekunignu hena, dim lamigteb amge Kayak Nug ig ii uuigte. Ag ig oikey, neta qetem amge ig nauha auta awaknab ii daatem. <sup>10</sup> Ig danab laa oh ag Jesusnu bauklel ihinigpa anidkulagnu amu ig Jesus Nug haen oh mauhak ib odepa dayom bia ig mauhak ib odepa daatem. <sup>11</sup> Yo, ig am Jesusnu udat hetem amunu haen oh ig bau daautut, danab ag Jesus, bau dayak nuhig, ig mauhaknu bedunig imupa miag atiak bekunu ig iqapeg mauhkunignu heteb. <sup>12</sup> Anam amunu ig Jesusnu nai mehuqtata, mauhak ibpa daautut, ag nai amu oolagpa genab doona, bauklel aoteb.

13 Kayak naipa, nai laa daate am inam. “Da Kayaknu oolpa genab doomi amunu da nuhignu matimi.” Amubia ig ele Jesusnu oonigpa genab dootem amunu ig maditem. 14 Adinu? Ig dootem, Kayak Nug he, Nadi Jesus Nug edua hibaitom, anamib geha Nug ig ele, Jesusnu gagatagpa ig ele mad ekeb, ig edut hipaidput amu Nug ig ag ele oh omaikeb gota, Nug ele oh laipu ou qak daagnig. 15 Am keeke imu oh beum amu ag ehanadkunu beum. Laa amu, Kayaknu ehanitak okai hamu megte amu gemu danab kudum laala oh ahilagpa am beebem amu ag Kayaknu, “Ena heme,” amu okainab anana, ag Nug binag atan humaglag.

### *OOPA GENAB DOYAKPA GAGATAG AWAKNU NAI*

16 Ig am dab mak amu aotem amunu Kayak udat hekunignu amu ig ii bodo edtem. Ao genab, ig bedunig amuam nauhkun hete amge ded oh Kayak Nug ig oonig bau gagatag medte. 17 Amu inam. Ihinigpa ug bete amuam nakokib, am haen tutu aakuib daate. Geha dimpa hab atan amu ig bau hanhan, ena dayak amu aognig. Hab atan bau ena dayak amuam ig bedunignu ug nakok imu huana edidte. 18 Anam daate amunu keeke ig amenigpa anadtem ele, ig amunu keeke amuam anuqak, dab ii metem. Iita. Ihinig dab mak okai gagatag amu keeke ig amenigpa ii anidtem ele amunu dab mak aotem. Adinu? Keeke ig amenigpa anidtem ele amu haen tutuib daaku, aria keeke ig amenigpa ii anidtem ele amu geha hanhan daaku.

## 5

1 Wanpan keeke haen tutuib daate, hab atannu

keeke am bauklele ele amunu ig imu am dab metat dootem. Ig gemunu bedunig am wan imupaib oiyaknu daate. Keeke hanhannu iita, danab nug peh haen tutuib daakunu hete, amubia. Anam daate amu aria peh nug nauhte, amubia ig bedunig gemunu nauhepeg amu Kayak Nug bedunig laa, lagnab bia, hab atan apa megakunu daate. Lag amuam Kayak Nug heum, danab laa ii heum. Nug hanhan daaku. <sup>2</sup> Gemu Nug hab atannu lag, ig lamen metem amubia ihinigpa mekunu oonig huana daate. <sup>3</sup> Adinu? Nug hab atannu keeke amu awa, ihinigpa meeb amu geha ig danab bedu miag atiak daate amubia ii daamta. <sup>4</sup> Ao, ig peh laka daatta, ig ug dootta aiqagtem amge ig wan imupanu bedunig imu uut, hamu daagnignu oonig ii daate. Iita! Ig hab atannu bedunig, wan imupanu bedunig qadepa meput dayeb, wan imupanu bedunig, ag mauhkulagnu daateb ele amu, ag hab atannu bedunig, ag hanhannu daateb amu, ag oolagpa daanna eduna, bauklelnu keeke daaglagnu oonig daate. <sup>5</sup> Kayak Nugib ig anam daagnignu ib babaitom daate. Kayak Nug genabnab genab geha keeke amu oh megakunu ipunigkunu Nug nuhig Oudi, hapin paniak bia, ig mekom.

<sup>6</sup> Diig amunu amu ig hab atannu bedunig aognignu dab mak aotem, ig ii aognignu amu ii dab metem. Ig anam dab metata amu ig imu ele dootem. Ig wan imupa oiyaknu bedunig ele oitem amu ig Nadi ele hab atan ou qak ii daatem. <sup>7</sup> Adinu? Ig Nug ele ou qak daagnig, nai amunu amu gemu ig dayak amunab ii anidtem amge gemu oitem imupa am ig geha Nug ele daagnignu amu ig

oonigpa genab doot oitem. <sup>8</sup> Amge da ami aaku, ig hab atannu bedunig aognignu dab mak aotem. Ig ii aognignu amu ii dab metem. Ig wan imupanu bedunigpa daagnignu am ena dootem amge ig bedunig imu uuidput, Nadi ele apanig diigpanab daagnignu amu ig amunu enanag dootem. <sup>9</sup> Anam daate amunu ig ii mauhmut, haen imupa, ihinig mauhak dimpa ele amu ig kobol oh, Nadi Nug oo daate, amubia hekunignu dab mak gagatag aotem. <sup>10</sup> Adinu? Ig dootem, geha ig oh Kristusnu hetodiak abenpa daagnig. Aria haen ig bedunig imupa daatta, ig kobol nau hetem ele dayeb amu geha ig amunu nob aognig. O iita ig daatta, ig kobol ena hetem dayeb amu geha ig amunu nob ena aognig. Yo, ig geha anen anen kobol hemutnu nob amuib aognig.

#### *DANAB KAYAK ELE OO LAIPU DAYAKNU UDAT*

<sup>11</sup> Amu ig Nadinu ena, oo otaiak ele dootem amunu ig danab ag nuhignu oolagpa genab dooglagnu udat okai hetem. Kayak Nug ig dooika malom, Nug noobpa am ig miag bemut daatem. Amu ig amubia ag oolagpa ele miag atiak daagnignu oonig daate. <sup>12</sup> Nai amupa amu ig ika ig oninig baula ii humatem. Ag ig danab ena anam doigkulagnu ii hetem. Iita, ig nai yaatem imu amu ag danab laala noolagpa ihinignu gamalag ahakunu yaatem. Am danab laala ag danab bedu dimitimnu keeke amunuib gamalag ahate, ag keeke laa danab oopa daate ele amunu ag gamalag ii ahate, ig ag danab amu geha edun naipa nob mekulagnu oonig dayeye, nai imu yaatem. <sup>13</sup> Ig Jesusnu oonigpa genab dootta, kobol laala, wanpan danab ag

amunu, “Kaaka kobol,” aon ateb ele amu, ig amu hetem dayeb amu ig Kayaknu dab meta hetem. O iita ig nai unuqag, doyak ena elepa nai maditem dayeb amu ig ag ehandadkunignu hetem. <sup>14</sup> Kristus nuhig oo mauhak amuib ig udat amu hekunignu mad edikom. Adinu? Ig imunu tutuku ena dootem, danab laipu Nugib ig danab oh ig abeninig awa mauhom. Nug ig onunig daya mauhom amupa ig oh aaku mauhmut. <sup>15</sup> Nug danab oh abenlagpa mauhomnu diig am, danab oh daateb amu ag aka ahilagnuib dab mena ii oimna. Iita. Ag am laa, Nug danab ehanata mauhom amu nuhignu dab menana oiglag.

<sup>16</sup> Anam amunu gemu am, ig oo alagpan kobolpa baula danab laa ib amupa ii epeditem. Genab anuka ig oo alagpan kobolpa Kristus epedimut amge gemu ig anam ii hetem. <sup>17</sup> Amunu aun nug Kristus ele laipu daatep, nug am danab bau. Anuka dayom amubia am iita. Nuhigpa keeke oh am bau daate. <sup>18</sup> Am Kayak nukaib he, amu oh bete. Anuka am ig nuhig keked daamut amge Kristusnu udat okaipa amu Nug he, ig Nug ele oonig laipu bemut daatem. Anam daautut, ig danab laa amelagpa Kayak Nug ag edua diikunu oo daate aput dooglagnu meikom. <sup>19</sup> Nai ihinig amu iiku. Kayak Nug Kristusnu udat okaipa danab ah oh ag ahilag hipuninnu nob madakunu uuom, amupa Nug danab ah oh ele ag oolag laipu daaglagnu ib babaitom. Aria Nug he, ag Nug ele, ag oolag laipu bekulagnu, nai amu mehuqaknu udat amu ig meke hetem. <sup>20</sup> Ig Kristus ode aota, nuhig nai maditem. Ig Kayak, Nug ig odenigpa

ag nai madate bia amu ig Kristus onigpa danab oh amelagpa, ag keked kobol uuna, ag Kayak ib babaitom ele amu, ag ib amu dim lamidna, Kayak ele oolag laipu daaglagnu unuqadtem. <sup>21</sup> Kristus Nug ehed laa ii heum amge Kayak he, Nug ihinig mana metak dayeye, Kayak Nug hipunin ihinig oh awa, laipu qag ma, Nug qadepa me, Nug mawom. Anam amunu gemu Kayak Nug ig anika, ihinignu, “Danab tutuku,” awa akunu elele.

## 6

<sup>1</sup> Ig Kayak ele oh udat hetem amunu ag Kayaknu ehanitak okai, Nug hamu matom amu, ag amu ii kakidmananu dab mekulagnu unuqadtem. <sup>2</sup> Kayak Nug, “Da ehanadkulnu daaiyi, ag gaegeg, da edua diikulnu dedpa da ehanadmi,” awa aum. Doyeg! Gemu am Kayaknu ehanitak okai awaknu haen. Gemu Kayak Nug edua awigkunu dab mete.

<sup>3</sup> Ig udat imu hetem amu danab ag ig anigna, udat imunu ehed doomnanu amu ig oiyak ihinig atog notata, danab ag ib apididkulagnu kobol laa ii hetem. <sup>4-5</sup> Iita. Ig am Kayaknu udat danab daatem ipuanadkunignu amu ig ug diigdiig bak haenpa ig gagatag daat, ug amu doot maot oitem amupa amu ipuanadtem. Ig ihinig kobolpa keekenu tutu mak haenpa, ihinignu oo aeg bak haenpa, oo doyak haenpa, oikak haenpa, mani guitak inikak haenpa, lamikak haenpa, udat nadi gagatag hak haenpa, niiak elele iita haenpa amu enug iqak haenpa ele amu ig haen amu oh ig gagatag daat, ug maotem amupa amu ig am Kayaknu udat danab ipuanadtem. <sup>6-7</sup> Laa amu ig am Kayaknu udat danab daatem amu ig ihinig opia

awak kobolpa, ihinig oo metak kobolpa, laa dilagnu oo aeg bak paha ii dootem kobol ihinigpa, laa dilagnu oo doyak kobol ihinigpa, ig Kayak Oudi ehanitakpa, ig ihinig oo mauhak kobolpa, ig nai genab maditem, kobol amupa amu Kayak gagatagpa ele ig am Kayaknu udat danab daatem ipuanadtem. Ig Kayaknu ban haknu keeke epenig nadiapa nanehpa ele adatem amupa amu <sup>8</sup> danab laala ag ig oninig humaeggeg amu danab laala ag am ig oninig adaeg note elepa amu danab laala ag am nai nau ig dimunigpa matiegeg amu danab laala ag ig kobol ena hetem amunu maditeb elepa, ig amu ohpa ig am Kayaknu udat danab daatem ipuanadtem. Am laala ag ihinignu ham bupuak danab anam doigteb amge ig am anam iita, ig nai genabnabib maditem. <sup>9</sup> Danab laala ag dooigteb amge, "Ig ag ii doyadtem," aon ateb. Ig am danab mauhkunu hete bia amge ig ii mauhtem, ig am bau daatem. Ig bu megteb amge bu nug ig iqe ii mauhtem. <sup>10</sup> Ig am oonigpa ug elenab amge haen oh ig am gamanig ahate. Ig daddek danab bia daatem amge ig am danab kudum keeke kudum madatem. Ig am epenigpa keeke laa ii daate bia amge keeke oh am ig adatem.

<sup>11</sup> Korint danab, ig ag amelagpa nai elab miag atiak matita, ahilagnu amu ig oo doyak okainab dootem. <sup>12</sup> Ig ahilagnu amu ig oonig huanak daate ipuanadtem amge ag ihinignu oolag daate amu ag amu ig ii ipunigteb. <sup>13</sup> Gemu da ag amelagpa atem, imu am danab nug bekod dilagnu ate bia atem. Ag ihinig kobol, amu nob mekulagnu, ag ele oolag oh ig mekaglag.



**PAULUS NUG KORINT TAMANIAKNU DANAB DAB MATOM**

<sup>14</sup> Laa nug Jesusnu oopa genab doote ele amu nug laa, Jesusnu oopa genab ii doote ele amu, nug ele layamnab aib dayom. Amu elele iita. Adinu? Opia awak kobol amu do tape nak kobol ele a oh laipu ou aqatkunignu elele iita. Amahlak amu gatatu ele oh laipu ou qetepte? <sup>15</sup> Kristus Satan ele a oolah laipu oh daaglahte? Danab Jesusnu oopa genab doote amu danab laa nug oopa genab ii doote ele a dab mak laipu adaglahte? <sup>16</sup> Ig Kayaknu lag gun amu badag ham bupuak lag ele ou aqatkunigte? Ag dooteb Kayak bauklel ele nuhig lag gun amu igib iiku. Anuka Kayak Nug inam aum. “Geha da ag ele oh daatta amu ag oolagpa oikul. Am geha da ahilag Kayak daappi, ag am geha dahil danab ah daaglag.” <sup>17</sup> Nug anam aum amunu Nug baula ele aum. “Ag ahan hipunin danab uuadna, ag gona, aben laih pide daaglag. Ag keeke dubutid amu ag aib adapig. Am ag anam hepeg amu geha da daka ag edue diiatoya, <sup>18</sup> geha da ag Mamelag daappi, ag am geha da bekalad adelad daaglag. Nadi gagatag ele Nug anam awa ate.”

## 7

<sup>1</sup> O da gamalad, Kayak Nug ihinignu nai amu qaka aum amunu ig oo alagnu amu oudinu dubutid ele oh gedidta, opia awak ena, elelenab daatu! Ig Kayak nuhignu ena doota, oonig ele otaieb daatta amu haen oh ig kobol ena tutuku dim lamidtu!

<sup>2</sup> Ag oolag amu ig mekeg! Ig heut, danab laa ehed ii doyom. Ig heut, danab laa nug hipunin

danab ii dayom. Ig danab laa bupuidtata, nuhig keeke laa ii adamut. <sup>3</sup> Da nai imu atem amu da ag bedulagpa nai yak ii hetem. Iita. Amge da matu ami aaku. Ig oonig amu ag maadtem amunu ag mauhkulag amu aria ig ag ele oh mauhkunignu ug ii dootem. Am ag bau daaglag amu aria ig ag ele oh bau daagnignu ug ii dootem. <sup>4</sup> Da nai tutuku miag ag amelagpa atem, da ag tutuku oiglagnu oolpa genabnab dootem. Da oolpa ahilagnu am gamag ahak huanaknab dootem. Da ug tonidte bia ii dootem. Ug ohnu ihinigpa bete amge da ool madodnab doyeye, da ool gamag ahak okai dootem.

<sup>5</sup> Adinu? Ig udit Makedonia beta, Titus anitutut, nug ahilagnu nai matiom. Tatam aben amupa ele am ig bedunig amu madod laa ii dayom. Iita. Danab laala ag ig ehed heigkulagnu heegeg amu danab laala, ag oolagpa genab doyak ele, ag ehed gomananu ig oonigpa ug nadi doomut. <sup>6</sup> Amge ami aaku. Kayak, Nug danab oo ug ele oo madod medate ele amu, Nug he, Titus gumika udie, amupa ig oonigpa madod doomut. <sup>7</sup> Am Titus udiom amupaib ig oonigpa madod ii doomut. Iita. Ag Titus oo madod metaeg, nug nai amu awa udia, ig amenigpa matie, ig oonigpa madod doomut. Am laa amu Titus nug ig amenigpa ag da anidkulagnu oolag huan daatenu, kobol naunu ag oolagpa ehed doyona gaatebnu, ag da ele, ig oh oonig laipu daagnignu amu ag dab mak huan aotebnu aum amunu da gamal huan ahate.

<sup>8</sup> Da dootem, yak dahil tatamnu amu he, ag oolagpa guitak okai doopig amge amunu amu da oolpa ug ehed laa ii dootem. Genab anuka amu

da amunu oolpa ug doomi amge gemu am iita. Da dootem, yak amu ag oolag ug matom amge amu haen tutuib. <sup>9</sup> Gemu da gamal ahate. Da ag oolag ug dayom amunu gamal ii ahate. Iita, ag oolag ug dayom amupa ag oolag eduom amunu da gamal ahate. Kayak Nug danab hipunin hete haenpa nug ug dookun dab mete amubia ag doopig amunu dahil nai amu he, ag ehed laa ii aopig. <sup>10</sup> Oo ug dayak, Kayak Nug he bete amu, oo ug dayak am he, ig danab aaku oonig edute. Kobol amupa am Kayak Nug ig edua awigte. Danab amunu am ehed laa ii dooma amge oo ug dayak, wannu kobolpa bete ele amu, oo ug dayak amuam he, mauhak bete. <sup>11</sup> Ag imu dab mekulag. Oo ug dayak, Kayak Nug ag amubia dooglagnu oo dayom amu, nug he, kobol diigdiig meu ena ele ahilagpa beum. Ug amu nug ag tapadate, ag Kayak tutuku dim lamidkulagnu wagai meteb. Ug amu nug ag tapadate, ag ahan, adi keekenu oolagpa ug daate amunu epedin elele medapig. Ug amu nug danab laa ehed heum amu ag bapaidkulagnu mad atom amu ag ele Kayaknu ena doon, oolag ele otaiom. Aria ug amu nug he, ag ig anigkulagnu amu ag oolag gayom amu ag ihinignu atem doopig amu ag gagatag dab mepig. Ug amu nug he, ag toliatak udat hekulagnu wagai mepig. Ug babaitak udat oh heteb amu ag ena eleleib heteb, ahilagnu adi laa matignig. Ag udat amu ena eleleib heteb. <sup>12</sup> Amunu am genab, anuka da kobol laa amunu udugpa ahilagnu yaami amge da danab nug ehed heum amu danab laa, laa nug nuhigpa ehed heum ele, amu dilah dab mein ii yaami. Iita. Da ag

Kayak noobpa ag genab ag oolag ig megateb amu dooglagnu da ad udug amu yaami. <sup>13</sup> Kobol ena elele ahilagpa daate anidmut, amu diig amupa ig oonig madod ele daatem.

Am ig amunuib oonigpa madod ele daatem amu iita. Ig diig laanu ele gamanig ahafe. Ag oh Titus gagatag qetaegeg, nug gamag ahom, ig amu anidta amu ig amunu ele iiku gamanignab ahafe. <sup>14</sup> Da anuka Titus amegpa ag hetebnu ag onilag humami amu ag anamib ena hepig amunu da udal ii nete. Iita. Nai oh ig ag amelagpa mehuqmut amu genab, anamib aaku ig Titus noobpa ag onilag humamut, am nai amu oh ele am genabib. <sup>15</sup> Titus nug ag gumata uke, ag nuhignu oolag ena doonna, ag ehed laa hemananu badan, ag nug aon amu ag oh nuhig nai amu dim lamidpig. Ag anam heeg, nug ag anam hepig amu dab maama, nug ahilagnu oo huan mauhte. <sup>16</sup> Gemu amu da ag kobol oh tutuku hekulagnu heteb genab dootem amunu da gamal ahafe.

## 8

### *KRISTEN AG LAILKAD EHANADKULAGNU NAI*

<sup>1</sup> O lailad, ig Kayak Nug Makedonia Kristen taniak ehanitak okai mate, ag amupa adi heteb amu ag amu dooglagnu akunignu hetem. <sup>2</sup> Ug okai ahilagpa beum amge ag oolag nauha autanab ii awom. Haen amupa am ag keekenu nena qena tutu mepig amge ag amunu bitumtum ii gopig. Iita, ag haen amupa ele oolag gamag ahak okainab ele doona, ag Kristen laa dilagnu dab mena, ehanadkulagnu amu ag men dodo huanak qag mepig. <sup>3</sup> Da amu anten doomi amunu iiku da

amu awe miag metem. Ag men do<sup>o</sup>do nakokib, ag mekulag<sup>u</sup>nu elele daapig aakuib ii mepig. Ii<sup>ta</sup>, ag amuam tudita<sup>k</sup>, laa ele, amu editak okainab mepig. <sup>4</sup> Ag ig ena ap<sup>u</sup>t, Kayaknu danab ah Juda daateb ele amu, ag ehanadkulag<sup>u</sup>nu ii daye daye unuqigpig. <sup>5</sup> Ig anuka Makedonia danab dilag<sup>u</sup>nu, “Geha ag men do<sup>o</sup>doib laala mekulag,” amut amge ag men do<sup>o</sup>doib ii mepig. Ii<sup>ta</sup>. Makedonia danab ag aka ag bedulag oh ele aon, ag aka Nadi epegpa mewona, Kayak oo daate amu dim lamidna, aaku ihinigpa ele anamib hepig.

#### *UDAT DANAB LAALA GEHA KORINT UDIGLAG*

<sup>6</sup> Anam daate amunu ig Titus, nug ag Korint danab ag oolagpa udat heehe, ag ehanitak amu bapaidkulag<sup>u</sup>nu dig mepig ele amu, nug heeb, ag udat amu paha malaglag<sup>u</sup>nu amu ig amegpa amut. <sup>7</sup> Amge keeke ohpa, ahilag oopa genab doyakpa, Kayak nai mehuqakpa, ahilag doyakpa, Kayaknu udat elelenab hakpa amu ihinignu oo mauhak kobol ahilagpa ele, ag kobol ena eleleib heteb, amubia aria gemu ag danab ehanitak udat ena imu ele enaib heig!

<sup>8</sup> Imu da ag do ii madatem. Ii<sup>ta</sup>. Amge da danab laala ag udat ena heteb ele amu andete, ag Korint ag adi hepeg ele antena, da ahilag oo mauhak am keeke hamutai o iita keeke genab eletai dookul. <sup>9</sup> Ag ihinig Nadi Jesus Kristus, Nug ag ehanadkunuib dab meum ele amu, ag kobol nuhig amu dooteb. Nug am keeke ohnu diig amge Nug ag ehanadkunu ha, Nug keeke iita ele dayom. Nug anam heumnu diig am Nug wanpa u<sup>di</sup>a, danab keeke iita ele oiyaya mauheb, ag ib amupa Kayak

noobpa enub danab daaglagnu heum. <sup>10</sup> Imu dahil dab mak amu iiku ag amelagpa atem. Mad laa amupa ag Korint danab, ag udat amu anuqna heeg, dig ma beum. Amge anamib iita. Ag udat amu hek

agnu, laa oh ii dab mepig haenpa, ag dig men dab mepig amunu <sup>11</sup> gemu ag udat amu hena, gog teig! Anuka udat amunu ag oolag paha otaiom, anamib gemu ag amu hena maleg! Ag ahilag keeke gane amu melemelpa heig! <sup>12</sup> Am danab nug layag ehanita, keeke medate, kobol amunu oo huan daate amu Kayak Nug kobol amunu am elele ena doote. Kayak Nug am danab nug nuhig keeke adi adi ele, amu ohnu aaku dab maama, danab amu kobol amunu hetodidte. Danab nug keeke nakokib amge nug laa ehanadkunu nuhig keekepanu nakok madate amu Kayak noobpa am danab keeke kudum ele am nug laa ehanadkunu nuhig keekepanu keeke kudum madate bia daate. <sup>13</sup> Da Juda danab, gemu ag tutu mena daateb ele amu, ag ena daapeg, ag Korint ag am ehed daaglagnu ii atem. Iita. Ag oh keekenu laipu eleleib daaglagnu ool daate. <sup>14</sup> Am gemu haen imupa am ag Korint ag keeke okai ele daateb amunu ahilag keeke amupanu amu ag hepeg, danab ag gemu keekenu tutu daateb ele amu, ag aoglag. Aria anam daapeg amu dimpa ag Korint ag tutu mepeg, aria danab ag Juda daateb ele amu, ag keeke kudum aona aria ag edun ag ehanadk

ag. Kobol amupa am geha ag oh keekenu laipu eleleib daaglag. <sup>15</sup> Amuam Kayak naipa yak daate bia. Nai amuam inam. “Danab nug bret onig mana kudum awom amu nug kudumnab iita. Aria danab nug elelepa nakokib awom, nug am qakub ii

meum.”

<sup>16</sup> Aria, da am Kayak amegpa, “Ena heme,” a<sup>t</sup>em. Adinu? Nug am Titus ehanite, nuhig dab mak amu, ihinig bia, laipu awa, nug ele ag ehanadkunu oo huan daate. <sup>17</sup> Ig nug adi hekunu amegpa amut amu odenig dim lamitom amge nug ele udat amu hekunu oo huan daye, nug nuka nuhig dab makpa ag gumata gote. <sup>18</sup> Aria ig lainig laa meut, nug ele oh gotep. Am Kristen tamaniak ohpa lainig amu nug Nai Ena mehuqkunu am nug gagatag ele amunu tamaniak oh ag nug binag meteb. <sup>19</sup> Amuib iita. Kristen tamaniak danab ag nug ig ele oh oitta, ehanitak udat imu oh hekunignu otipig. Ig udat imu oh hetata amu ig Nadi onig humagnignu, ig udat imu hekunignu oo gedak dootem amu ele ipuanadkunignu hetem. <sup>20</sup> Laa ele amu, ig geha danab laa nug ig ehanitak kobol imu hetem, amunu nai ehed laa akunu oonig ii daate. Ig oonig anam ii daate amunu ig lainig nug ig ele oh oignignu hetem. <sup>21</sup> Am ig ehanitak kobol imu ib tutukupaib Kayak amegpa hekunignu dab metem. Amge ig Nug amegpaib tutuku hekunignu ii hetem. Iita. Ig danab ag ele ig kobol tutukupa hetem anidkulagnu hetem.

<sup>22</sup> Aria ig am ig lainig laa ele meut, nug a ele oh goteb. Ig haen kudum udat diigdiigpa ig nuhig hak meta anidmut, am nug udat amu hekunu nug elele gagatag heum. Gemu nug ag Korint daateb amu, ag adi hekulagnu apig amu ag hekulagnunab daateb doote amunu nug am udat amu hekunu elelenab doote. <sup>23</sup> Titus nuhignu am ag inam anidkulag. Nug am dahil kadoi, ag ehanadkunu dahil udat

laipu. Aria ig lainti adit amu a am kristen tamaniak oh dilag udat danab, ahilah udatpa a Kristus binag metep. <sup>24</sup> Aria ag oo mauhak ahilag amu ag ipuanadpeg, kristen tamaniak oh ag ahilag oo mauhak genabnab doopeg amu ag dooglag, ig ahilag udatnu hamu gamanig ii ahate.

## 9

### *KAYAKNU DANAB AH EHANATAKNU NAI*

<sup>1</sup> Ag Kayaknu danab ehanataknu amu ag aaku doopig. Da amunu nai elab laa ii yaapa. <sup>2</sup> Da ag udat amu hekulagnu ag oolag gedate dootem amunu da haen oh Makedonia danab noolagpa ag onilag hume, inam amelagpa atem. “Grik danab Korint daateb amu mad matu amupa ag udat amu hekulagnu bapaidpig.” Amu ag ehanitak udat imu hekulagnu gagatag heegeg, Makedonia danab ag amu doona, kudumnab ag ele amu hekulagnu oolag gedate. <sup>3</sup> Amge da nai matieye, ag onilag humatem, nai amu geha hamu bia daamanu, ag da ami amubia ag men dodo qag mena, mepeg daakunu amu da lailad hei, aaku ag gumadna goteb. <sup>4</sup> Laa amu da ahilagnu eledenab doyeye matimi amunu Makedonia danab laala ag ig ele oh gota, ig Korint danab ag ii bapaidpig anidput amu geha ig ag ele oh ig amunu uda nak doognig. <sup>5</sup> Amunu da lailad amelagpa api, ag anuqna ag gumadna gokulagnu am ena, da anam dab memi. Ag gona hepeg, ehanitak keeke ag amu bapaidkulagnu apig amu da ii ukak haenpa bapaidkulag. Ag Korint ag anam bapaidpeg, anam dayeb, awaknu am oo gamag ahak ele. Awaknu am oo nauhak laa iita.



<sup>6</sup> Amge ag imu tutuku anidna doyeg! Danab nug e tumu kudum ii ebte, nug e kudum ii aote. Aria danab nug kudum ebate, nug kudum aote. <sup>7</sup> Ag anen anen oh ahilag dab makpa, ag aka ag oolag amu tutuku elele anidna, ahilag dab makpa oolag atem daate amuib ag keeke metaglag. Danab laa nug keeke oo qeebeb, ehanitak keeke maama, dab mak nuhigpa, “Ag gagatag wagai mena hepig amunu da matami,” ii dab mema. Iita, Kayak Nug danab nug oo gamag ahebeb, ehanitak keeke amu mekunu oo daate. <sup>8</sup> Am Kayak Nug ehanitak oh ag mateb amu geha ag keeke am bak ele daaglagnu hekunu elele. Amupa ag haen oh keeke eleleib daanna amu ag keeke kudumpa udat ena oh ele hekulag. <sup>9</sup> Kayak naipa nai laa kobol amunu am inam daate. “Nug keeke kudum dadek danab madate, nuhig kobol enanag amu haen oh daate.” <sup>10</sup> Kayak, Nug e epaknu danab e tumu madate, Nug e diigdiig danab oh lakulagnu ele madate amu, Nug geha ag keeke oh elele mateb, ag kristen laa madapeg, aria geha kobol ena ahilag amu nug ba, danab e epe, dimpa e meu huanaknab ote, amubia ii tuqa aoma. <sup>11</sup> Ag geha keeke kudum ele daanna amu ag keeke kudum lainkad mataglagnu elele. Amu ihinig udatpa ehanitak keeke ahilag amu geha ig lainkad ag amu aon, amupa ag Kayaknu, “Ena heme,” aon akulag.

<sup>12</sup> Ag udat anam henana, ag Kayaknu danab ah ehanadpeg, laala ag keekenu tutu daateb amu ag elele daaglag. Amge amunuib iita. Ag Korint adi ag kobol amu anam hepeg amu Juda laa, ag dadek daateb ele amu, ag Kayak amegpa, “Ena

heme,” okainab akulag. <sup>13</sup> Ag layag ehanitaknu udat imu hekulag am geha ahilag kobol amu heeb, ag am genab Kayaknu danab daateb am miag atiak bekulag. Am geha ig lainkad ag ag Korint danab, ag Kristusnu Nai Ena dim lamidtebnu ateb amu ag genab anam heteb anidna, ag Kayak binag mekulag. Aria geha ag ahilag ehanitak okai ag madapig doonna amu danab ag amupa geha ag oh amu Kayak onig humaglag. <sup>14</sup> Am geha danab oh ag Kayak Nug ehanitak okai, ag Korint ag hamu matom anidna dooglag, amupa geha ag ahilag nu oolag enanag doon, Kayak Nug ag ititak madakunu unuqidkulag. <sup>15</sup> Ehanitak Kayak ig megte amu okainab, ig nai amu oh mehuqkunignu elele iita. Ehanitak amunu ig Kayak amegpa, “Ena heme,” aakuib akunig.

## 10

### *PAULUS NUG, NUG EHED HEUMNU NAI TAPE NOUM*

<sup>1</sup> Da am Paulus. Am danab laala ag nai da bedulpa yaan, inam aon maditeb. “Nug ig ele daatem haenpa amu nug nuka onig qe ne, ig ele daatem amge haen nug pide dayaya amu nug nai gagatag amu ig megte,” aon ateb. Amge da Paulus, da am Kristusnu kobol, Nug nuka Nug binag ii dab maama, Nug oo madodpa kobol bodo etak madod ele danab dilagpa heum, amubia da ahilagpa hein, nai madipi, ag dahil nai dooglagnu unuqadtem. <sup>2</sup> Ag oolagpanu laala ag ihinignu, “Ag wan imupan kobol adan oiteb,” aon ateb amunu da atem. Ig ag gumadta gota, da dab mak ehed amu qepi nekunu daatem amunu da nai gagatag

ag amelagpa madipanu amu ag aka dab mak ehed amu qepeg nad! Ag anam ii hepeg, da ukena amu da danab ag dab mak amu ele amu, ag amelagpa nai gagatag madikul. <sup>3</sup> Danab laala ag ig wan imupan kobol aot oitem ateb amge iita. Am genab, ihinig oiyak amu ig wanpa oitem amge ig wanpa ban heteb bia ig ii hetem. <sup>4</sup> Ban haknu keeke oh ig adatem amu, ag wanpan keeke iita. Iita. Ig adatem ele amuam Kayaknu gagatag ele, ig kekednu ad gagatagnab amu amupa lopadtem. <sup>5</sup> Amu ig dab mak oh amu matiak pide pide oh ele Kayak di medate ele amu lopadtem. Amu ig dab mak oh mani guadta, dab mak oh amu Kristusnu dab mak aakuib dim lamidkunu hetem. <sup>6</sup> Ig Kayaknu ban haknu keeke adatem amunu ag oolagpan aun adi ag ihinig nai dim lamidteb tatam doota, dimpa amu ig nai tape nak danab amupa nob nau matagnig.

<sup>7</sup> Ag keeke unuqagnab amu ii anidteb. Danab laa nug nuhignu, “Da am danab tutuku, Kristusnu danab daatem,” gagatag dab meteb dayeb amu nug edua imu ele antad! Nug am Kristusnu danab daate, amubia ig ele am Kristusnu danab daatem. <sup>8</sup> Am Nadi Nug ig ahilag oopa genab doyak amu gagatag qetagnignu udat amunu ehah mekom. Ig anam heput, ahilag oopa genab doyak na qekunu ii mekom amunu da ehah amupa da daka da onil nakok okai bia humatem dayeb amu da udal ele ii nema. Da adi hekulu atem am da hekul. <sup>9</sup> Ag, “Nug nuhig yakpa nug hamu ig badak megte,” dab mekulagnu amu da ool ii daate. Ag anam aib dab mepig! <sup>10</sup> Da atem amunu diig am, danab laala ag dahilnu inam ateb. “Ao, yak nuhig amuam

gagatagnab, ug ele amge nug udie, ig nug bedu anidtem amu gagatag iita, nuhig nai amu ele bodo etak,” ateb. <sup>11</sup> Am danab nai anam maditeb ele amu ag tutuku dab mena anidna, inam doyeg! Ig pide daatta, udugpa ahilagnu yaatem am ig ahilagpa gopot, ag ele oh daata amu ig kobol udugpa yaa-mut amu aakuib ig ag oolagpa ele hekunig.

<sup>12</sup> Laa amu, ag oolagpa laala ag, “Ig am danab enanag,” aon ateb ele amu, ig amu dilag melemel amu aot, ig bedunigpa meta doognignu elele ii dootem. Aria ig ahilag kobol ele aot, ihinig kobol melemel amupa ii hetoditem. Iita. Danab amu ag aka aka meulagpa doonna, ag aka ag epediadteb. Am danab amu ag ahilag kobolnu amu ag aka ahilag kobolib anidna, ahilag kobol melemel amupa epedidteb. Danab amu ag am doyak ena iita. <sup>13</sup> Amge ig am ig oninig hamu humaput atan tekunu ii hemata. Iita. Kayak Nug ig udat hekunignu udat amu mekom amu aakuib ig neekidtata, ena hemut anidtem dayeb amu ig amunu ig oninig humagnig. Am Kayak Nug udat mekom ele amu ag Korint danab ag udat amu oopa daateb. <sup>14</sup> Yo, ag udat Kayak ig hekunignu aum oopa daateb amunu ig ahilagpa gota, udat hemut ele amu, ig Kayak nai tipalta ii gomut. Iita. Ig nuhig nai aaku dim lamidta, Jesusnu Nai Ena ahilagpa batak mehuqmut amunu ig oninig humatem amu ig hamu ii hetem, ehed ele ii hetem. <sup>15</sup> Ig anam mehuqtata amu ig udat danab laala hepig ele amu, ig amunu ig oninig ii humamta. Iita. Ig geha ag Korint, ag ahilag oopa genab doyak amu gagatag beeb, ig ag oolagpa udat hetem amu ba, okai tudita elele

daakunu hetem. <sup>16</sup> Anam dayeb am geha ig nai ena amu aot, wan laala ag heqolagpa daateb, apa gokunig. Amupa amu ig danab laa nug nuhig udat heumpa nota, ig oninig hamu ii humamta. <sup>17</sup> Amge ig ika ig oninig humagnignu Kayak naipa nai daate amubia am ena iita. Nai am inam. “Aun nug onig humak hekunu oo daate amu nug Kayak adi heum amu dab maama, Kayak onig humad!” <sup>18</sup> Ig danab nug nukā onig humate, danab amu nug am Kayak noobpa onig ele ii dab memata. Iita, Nadi Nug danab onig humate, danab amuib am nug onig ele.

## 11

### *PAULUS TOTOL HAM BUPUAK DILAG HAK MIAG ATIOM*

<sup>1</sup> Ag da dab medapeg, da nai hamu madikulnu hetem imu amu ag amu doona, ag oolag aib nauhom. Ag dooglagnuib dab mekulag. <sup>2</sup> Kayak Nug ig danab ihignu dab huan maama amu nukā nuhignu tituanikom amubia da ele ahilagnu anamib dab metem. Ao, da nid ahin bau, oiyak nuhig tutukuib, nug mameg danab laanu ah daakunu nug epegpa mete bia, da ag opia awaknab amubia daapeg, Kristus medakulnu hetem. <sup>3</sup> Amge da badatem. Mat nug nuhig doyak okaipa anuka Ewe bubuite na qeum amu, kobol anam amu laa ahilagpa ba edateb amu ag opia awak kobolpa dayak amu edidna, Kristusnuib ii dab memananu ool badate. <sup>4</sup> Adinu? Danab laala ag gumadna gona, Jesusnu nai kabolinna, ahilag dab makpa nai ag amelagpa mehuqeg, ag aoteb. Jesusnu nai amuam da Jesusnu nai mehuqtem ele amu, a laipu

iita, am laa. O iita danab amu ag oudi laanu mehug<sub>e</sub>g, ag aot<sub>e</sub>b. Nug am Kayak Oudi, ag anuka aopig ele amu, Nug iita, am laa. Amu ag nai diig laa mehug<sub>e</sub>g, ag aot<sub>e</sub>b. Nai amuam Nai Ena, ag matu aopig ele amu iita, am laa. Danab ag kobol amu ag oolagpa het<sub>e</sub>b ele amu ag Korint danab ag agib dab met<sub>a</sub>n daanna, oolag het<sub>e</sub>. <sup>5</sup> Doyeg! Dahil dab makpa amu total danab amu, ag danab amelagpa anuqak daat<sub>e</sub>b amu, da ag waalagpa nakok laa ii daat<sub>e</sub>m. <sup>6</sup> Genabtai da nai mehuqak kobol am tutukunab ii doot<sub>e</sub>m amge da am doyak aomi. Da haen oh, kobol dahil ohpa ele amu da ag amu ipuanadmi.

<sup>7</sup> Da Kayaknu Nai Ena ag amelagpa mehuqen, da nob daden laa ahilagpanu ii awen, kobol amupa da daka da adailen nein, ag onilag humakulnu aakuib hemi amunu atemutai? Da kobol amu hemi amu da amupa ehed laa hemite? <sup>8</sup> Da kristen tamaniak laalapanu men dodo aomi. Amupa da ehanideg, ahilagpa ud<sub>a</sub>t hemi. Da anam hemi amunu da tamaniak laapa, ahilag keeke hamu adadmi. <sup>9</sup> Anuka da ag ele oh daata, da keeke laanu tutu dayeye, da ag oolagpanu danab laa amunu ug ii met<sub>a</sub>mi. Iita. Da lailad adi ag Makedonianu ahan gona, Korint tena, da adi keeke laalanu tutu memi amu ag medapig amunu da ag Korint danab ag ug nakok laa ii mat<sub>a</sub>mi, geha ele da anamib hekulnu dab met<sub>e</sub>m. <sup>10</sup> Da Kayak nai mehuqkulnu heinne, tatam da danab ag dooglagnu daat<sub>e</sub>b ele amu ag men dodo medaglagnu api, ag men dodo medaglagnu, "Yo," apeg, da Kayak nai mehuqkulnu ii het<sub>e</sub>m. Da kobol amu uumi, da Kayaknu nai danab ah hamu

madakulnu dab mein hetem. Genab da Kristusnu nai dahilpa daate amunu genab dootem amubia laa nug heeb, da kobol binag ele hetem amu, da uukulnu elele iitanab dootem. Da Grik wan ohpa anam hekulnunab daatem. <sup>11</sup> Adinu da anam hetem? Da ahilagnu oo mauhak ii dootem amunute? Iita! Kayak Nug da ahilagnu ool mauhte, amuam Nug doote. <sup>12</sup> Amge danab laala, ag aka onilagib humaglagnu oolag daate amunu danab amelagpaib matin, kobol da hetem kobol amunu gadaib heteb ele amu, da ahilag ib amu oo nekulnu iiku udat heinne, da udat hetem bia anamib baubau hekul.

<sup>13</sup> Danab amu ag am total danab ham bupuak. Ag am ham bupuak udat danab, ag danab amelagpa total danab bia daateb amge ag gadalag aakuib Kristusnu total danab daateb. <sup>14</sup> Ag Korint daateb ele amu, ag amunu aib otaipig. Adinu? Ig dootem, Satan nug nuka hanhan kobol nuhig he edue, nug gadapaib amahlak engel bia bete. <sup>15</sup> Anam amunu nuhikud udat danab ag ele ham bupun henana, ag danab amelagpa, “Ig kobol opia awak ele amunu udat danab daatem,” aon akulag dayeb amu ig amunu am dab mak okai ii aomta. Ig ii otaimata. Geha dimpa ag udat heteb, amupa nob ahilag aoglag.

### *PAULUS NUG TOTOL UDATPA UG KUDUM MAWOM*

<sup>16</sup> Nai imu da matu matimi ele amu, gemu bau madikulnu hetem. Danab laa nug dahilnu, “Nug kaaka danab,” aib dab meum amge ag dahilnu anam akulagtai. Am ag dahilnu anam dooglag dayeb amu ag danab kaaka laala, ag amu dilag dab menan, nai ahilag dooteb, amubia ag da dab

medapeg, da ele daka dahilpa adi beum, Kayak Nug da epelpa adi adi udat heum amu da ainne, amupa da onil nakok humapi dooglag. <sup>17</sup> Nai imu da Nadi odepenu awe ii atem. Iita. Da amunu api, ag da tutuku anidna, dahil nainu genab doona dim lamidkulagnu da daka, kaaka danab heteb bia, da onil humen madikulnu hetem. <sup>18</sup> Danab kudum ag wan kobol dim lamidna, ag aka onilag humateb amubia da ag Korint danab, ag nai tutuku, da ag amelagpa ami ele amu, ag amunu oolagpa genab dooglagnu, da ele laa ag heteb bia, da daka onil humakul. <sup>19</sup> Ag Korint amu ag aka ahilagnu amu ag am dab mak ena ele dooteb amge ag danab kaaka amu doyardna dab matan daaegeg, kaaka danab amu ag kaaka nai aaku ag madateb! <sup>20</sup> Ao, danab laa nug ag nugib waapa daaglagnu ate dayeb, o nug keeke ahilag amu oh aote dayeb, o nuhig ham bupuakpa ag diite dayeb, o nug ag awa awa aqate dayeb, o nug enaen ma dutunadte dayeb amu aria ag nuhig nai epedilob am ena amge ag anam ii heteb amunu nug aaku anam hete. <sup>21</sup> Genab, ig am kobol danab amu ag heteb bia ahilagpa laa iinab hemut amunu da, "Ig ehed hemut," ii apa.

Amge danab laa nug gagatag ma, nuka nuhigpa adi keeke binag ele daate amunu madite amu dahilpa ele anam daate amu madikulnu elele. Gemu amu da dahil nai matiak kaaka danab nai matiak bia maditem. <sup>22</sup> Totol danab ham bupuak amu ag am Hibu danabte? Aria da ele am Hibu danab. Ag Israel danabte? Aria da ele am Israel danab. Ag am Abraham budubte? Aria da ele am Abraham budub. <sup>23</sup> Ag Kristusnu udat danabte?



(Da gemu amu kaaka nainab maditem.) Kristusnu udatpa amu da ag edadtem. Dahil hak gagatagpa da ag edadmi, Jesusnu nai mehuqaknu mani guitakpa dayak am da ag edadmi. Danab ag da wippa matadileg, kudumnab batom, amupa da genab ag edadmi. Aria laa ele haen kudum da mauhkulnu miag daami, ag am anam bia iita. <sup>24</sup> Haen tanig ele Juda danab ag wip mudipa da matadileg uke, 39 batom. <sup>25</sup> Haen ewam ag bupa da oidpig, ag haen laipu menpa oidkulagnu men epig. Haen ewam da yupa oiyi, ug be, ub nauhom. Tuqan laipu amu aam laipu ele da yupa maya memi. <sup>26</sup> Da haen kudum ib uma amu gomi. Da lepa padal mekulnu hemi. Danab nau ibpa daanna, danab ukaegeg, makudadna, keeke ahilag aduadteb ele amu, ag epelagpa heeg, nauhkulnu hemi. Da lailad ag ehed heidkulagnu heegeg, iita adi danab ele, ag da ehed heidkulagnu hepig. Ab okaipa ag da ehed heidkulagnu hepig am atu tadakpa, danab iitapa, ag ehed heidkulagnu hepig. Yupa da padal mak abenpa daami amu kristen tamaniak oopanu ham bupuk danab, ag ele da ehed heidkulagnu hepig. <sup>27</sup> Da udat diigdiig huanak hemi. Haen kudum da tuqan udat heinne, niyak ena ii niimi. Da enug iwewe, le baal ele diiom. Haen kudum da e elele iita daaiyi, ulah iwewe, lamennu tutu daami. <sup>28</sup> Aria amuib iita. Haen amu ohpa da kristen tamaniak dab madakulnu dab mak kudum aoiyi, ug amuam ugnab bedulpa okainab me doomi. <sup>29</sup> Am danab laipu nug gagatag iita aria da ele am gagatag iita bia daatem. Am danab laa nug hipunin hete, aria da oolpa amu da ug dootem.

<sup>30</sup> Am ib laa iita, da daka da onil humakulnuib daate dayeb amu aria da dahilnu adipa da gagatag iita, da amupa onil humakul. <sup>31</sup> Kayak, Nadi Jesus Mameg, ig Nugib haen oh binag mekunig ele amu, Nug doote, da ham ii bubutem. <sup>32</sup> Am Damaskus apa king Aretasnu ehanitak laa, nug Damaskus ab okainu od gumak danab maateb, ag da adailpeg, mani guitakpa meidkunu heum <sup>33</sup> amge da lailad laala ag da kalegpa inidna, ab okainu ad ode laapa padaeleg, da dimitim nomi. Anam heeg, da Aretasnu ehanitak amu nug epegpan oole gomi.

## 12

### *KAYAK KEEKE KUDUM TULEGLEGPA PAULUS IPUNITOM*

<sup>1</sup> Korint danab, ag bedulagpa da daka onil humatem. Genab, onig humak kobol imu nug ig ii ehanigte amge da tuleglegpa nai lokumak laala, Nadi Nug da amelpa miag atiom amu, da amunu ele madikulnu iiku hetem. <sup>2</sup> Kristusnu danab laa amu da dootem. Anuka mad 14 ii ugeke, Kayak Nug nug awe, hab atan uka, hab ewampa teum amu nug mauhomte o iita nug iite mauhom amu da ii dootem. Kayak Nugib doote. <sup>3</sup> Da Kayak danab amu awa, Paradispa ukom amu da dootem amge nug mauhomte, o iita iite mauha ukom amu da ii dootem, Kayak Nug doote. <sup>4</sup> Amge Paradis apa nug nai diig laa doyom, danab nug nai amu ig danab ihinig naipa mehuqkunu elele iita, amu nai amu mehuqaknu am ele gun ele. <sup>5</sup> Danab amubia aakuib amu da nug onig humakulnu ool daate amge da daka da onil ii humapa. Iita. Da

daka gagatag iita amu da amunu akul. Da gagatag iita daaiyi, Kristus Nug dahilpa udat hete amu da amunuib akul. <sup>6</sup> Genab, da daka onil humakulnu elele' amu da helom amu geha da kaaka danab bia ii daalom. Iita, da nai genabib alom amge da daka onil ii humapa. Adinu? Geha danab laa nug dab mak nuhigpa dahilnu, "Nug am danab enanag," anam dooidkunu amu, da ool ii daate. Da ool daate amu geha ag dahilnu adi dab mekulagnu amu ag kobol da hetem amu anidna, nai da mehuqtem amu doonna, amupaib ag dahilnu tutuku dooglag.

<sup>7</sup> Tatam danab laanu matimi amu daib. Paradispa amu Kayak Nug da keeke ipuniDOM ele, amuam keeke okainab. Amunu diig amunu Kayak Nug da daka onil huan humapanu amu Nug keeke laa, qaun bia, da yaaidkunu medom. Amuam Sattannu udat nid, nug da daka onil huan humapanu tapideb nekulnu daate. <sup>8</sup> Da haen ewam Kayak Nug bedulpanu keeke amu uhuqkunu unuqidmi <sup>9</sup> amge Nug da amelpa inam aum. "Dahil ehanitak okai hamu medatem ele, amupaib na elele daatem. Adinu? Dahil gagatag amu danab ag gai iita daateb ele amu, ag gagatag ele aon daaglagnu amu nug ahilagpa aaku udat enanag hete." Nadi Nug anam aum amunu da gagatag iitanu ool ug ii daate. Iita! Da amunu Kristusnu gagatag aakuib dahilpa daakunu gamalib ahehe, adi keeke da hekulnu da gai iita daatem amu, da amunu onil humakul. <sup>10</sup> Anam amunu haen da Kristusnu udat hekulnu amu da gagatag iita, haen da Kristusnu udat hetem amunu danab ag da ehed heidteb, haen da Kristusnu udat hetem amunu da ug diigdiig da bedulpa dootem amu haen da Kristusnu udat hetem amunu

danab ag heeg, da ehed daatem ele amu, da haen amupa oolpa ena dootem. Ao, haen da gagatag iita daatem amu haen amupaib aaku da gagatagnab daatem.

***PAULUS KORINT DILAGNU DAB MEUM***

<sup>11</sup> Da nai maditem imu am kaaka nai amge ag aka da nai imu inam madikulnu dutunideg, da maditem. Adinu? Ag da onil humaglagnu am aib iita, amu kobol elele, ag helob am ena amge ag anam ii hepig. Genab, da amu keeke hamu amge da gadalagib total danab ahilkad amu ag waalagpa ii daatem. <sup>12</sup> Iita, da daka da ool gagatag qein dayeye, da ag Korint ag oolagpa udat kudum huana hemi. Aria da heinne, total danab dilag ehanataknu keeke kudum aaku hei, miag atiom. Keeke amuam eponak keeke diigdiig danab hekunu elele iita. <sup>13</sup> Da kristen tamaniak laapa kobol laa hetem, anamib aaku ahilagpa ele hetem. Laipuib amu da ahilagpa ii hemi. Amuam da ahilagpa ehanitak laa ii aomi. Gadon ag dahil hak nau amu uhuqna medeg!

<sup>14</sup> Aria gemu da haen ewam ag gumate gokulnu hein bapaidtem. Da geha uke, keeke ahilag amu ii adadpa. Doyeg, da keeke ahilag aokulnu ool ii daate. Iita, da ag diiadkulnu ool daate. Ag dooteb, nid ag mamelkad anilkad ehanadkulagnu keeke bapaidna ii qag meteb. Iita, mameg anig agib nid ehanadkulahnu keeke qag metep. <sup>15</sup> Aria da am dahil keeke oh ahilagnu agapi gokunu ug laa ii dootem. Am dahil bau dayak ele, ag ehanadkulnu maopi gokunu ug ii dootem. Da oo mauhak ahilagnu huanak dootem dayeb amu ag amu anidna, ag dahilnu oo mauhak nakokib dooglagte? <sup>16</sup> Nai

amunu aaku elele, anam dayad! Amge ag laala am dahilnu inam aon ateb. “Genab, nug ihinig keeke miag atiakpa amu ii aote amge nug nai itag matiak danab amunu ham bupuak kobol haaha, ig noonig yaaya eedigte,” aon ateb. <sup>17</sup> Amge atemnab? Da danab laala maati, ag gumadna gopig, amupa da ahilagpa ehed laa hemite? Am da ahilagpa danab laa ham bubuitete, nug epegpanu nuhig keeke laa adidmite? <sup>18</sup> Da Titus amu ig lainig imu ele a oh maati, a oh ahilagpa gopid am Titus nug ham bupua, ahilag keeke laa adomte? Am nug da ele i Kayak Oudi laipu amu Nuhig gagatagpa i iite oitep? I ib laipupaib iite oitep?

<sup>19</sup> Ig nai imu yaaut, ag eb qenana amu ag, “Ig ag hetodiadta, ena anadta aput, ig oh edut laipu daagnignu heteb,” anam dab metebtai. Amge iita. Ig Kristusnu danab daatem amunu ig Kayak noobpa nai imu maditem. O lailad, gadonnab, da nai yaami imu oh amu ahilag oopa genab doyak amu gagatag qedakulnu yaami. <sup>20</sup> Da ag gumate uke tein, da ag danab atem daaglagnu ool daate amu, da anam bia ii anadkulnu, ag ele da anidna, da danab atem daakulnu oolag daate amu ag anam bia ii anidkulagnu amu da ool ii daate. Da nai a ona a doak kobol, layagnu ehed doyak kobol, nai hak kobol, enaen mak kobol, awa awa qetak kobol, dimug nai matiak kobol, nai ii doyak kobol, kristen tamaniak kaboliak kobol ele amu da amu anidkulnu ool ii daate. <sup>21</sup> Am da edue ag gumate gopi, Kayak Nug ahilag hak nau ipunideb, ag noolagpa da udal nekunu ool ii daate. Geha da danab ah kudum ag hipunin diigdiig, dubutid kobol, gapai kobol, hipadu ahak kobol ele

hepig, ag amunu oolag ii eduom ele antena amu, da amunu gaakul amge da anam anten gaakulnu ool ii daate.

## 13

### *PAULUS NUG KORINT DANAB DAB METAKNU NAI MATOM*

<sup>1</sup> Gemu da haen ewam aaku ag gumate gokulnu hetem amunu Kayak naipa nai inam daate amu ag dooglagnu atem. “Danab laa bedupa nai yaaglagnu dayeb amu danab adit a ahai anam hekulah o iita danab ewam ag ahan anam hekulag am nai amu gagatag daaku. Danab laipuib am elele iita.” Da gopi, ag ig ele nai laala ib amupaib bapaidkunig. <sup>2</sup> Danab ag anuka hipunin hepig amu danab laala oh ele amu da namba tu haen ahilagpa gomi, haen amupa da ag ele oh daata, da kobol adi ag oolagpa hekulnu amu aaku ai, ag doopig. Aria gemu ele da ipa dayeye, da am nai imu edue inam atem. Am da edue ag gumate uke, da danab hipunin tatam hepig o iita gemu heteb amu da nob madaikulnu ag ii uuadpa. Iita! <sup>3</sup> Da anam hepi, ag genab tutuku dooglag. Kristus Nug da odelpa nai madite. Doyeg! Kristus Nug ahilagnu ha, Nug udat nuhig ii bodo edate. Iita, Nug ahilagpa udat gagatag hete. <sup>4</sup> Genab, anuka Nug danab bedu, danab bedu am gagatag iita, Nug danab bedu awa daye amu ag Nug ad emaitakpa atulpig amge Kayaknu gagatagpa gemu Nug bau daate. Amu ig ele danab bedunig ele daatem amunu ig ele gagatag iita amge Kayaknu gagatagpa ig Nug ele bau daatem amunu geha ig

nuhig gagatagpa amu ag oolagpa udat heput, ag ehanitak aoglag.

<sup>5</sup> Ag aka aka ag Kristen daatebte o iitate amu anidna italna epedieg! Ag Jesus Kristus, Nug ag oolagpa daate iite dooteb? Yo, ag elele daateb dayeb amu Nug ag oolagpa daate. Iita am iita. <sup>6</sup> Amu ag ig elele daatem, ig neta ii qemut amu, ag amu anidkulagnu ool daate. <sup>7</sup> Ig Kayak Nug ag ehanateb, ag kobol ehed laa ii hemananu unuqidtem. Ig ika ig iiku miag beta, elele daatem anidkulagnu amu ig anam ii unuqidtem. Iita. Danab ag ihinignu ena dooglagtai o iita ena iita dooglagtai amge ig ag Korint danab ag kobol opia awak hekulagnu oonig daate, aakuib. <sup>8</sup> Adinu? Ig keeke laa heput, nai genab amu tapeb nokunu elele iita. Ig nai genab ehanidta hekunignu aakuib am elele. <sup>9</sup> Ig am gagatag iita daautut, ag gagatag daaegeg amu ig amunu gamanig ahate. Haen oh ig geha ag tutuku elelenab ahan daaglagnu Kayak unuqidtem. <sup>10</sup> Gemu da ipa dayeye amu da ahilag nai imu yaami, amunu diig am, da nai imu yaapi, ag anidna eb gena, ag yaami bia keeke bapaidpeg, geha da gopi, ag ele daatta amu udatnu gagatag, Nadi Nug da medom imupa, da amupa ag epediadkulnu udat laa ii daama. Nug da medom imu am, ahilag oopa genab doyak amu gagatag qedakunu medom. Da hepi, ag nena qekulagnu ii medom.

### *HUMATAK NAI*

<sup>11</sup> O lailad, da gemu nai baag qein da ag humadtem. Ag tutuku elelenab bena daaglagnu udat heig! Ag da nai atem imu doona, ag oh dab

mak laipu adan, oolag laipu mena madod dayeg!  
Ag anam hepeg amu Kayak, Nug oo mauhak,  
oo madod diig daate, Nug ag ele oh daaglag.  
<sup>12</sup> Ag ig kristen danab ihinig kobolpa, ag oh anen  
anen kobol opia awak elelepa ag nug humiteg!  
<sup>13</sup> Kayaknu danab ah amu ag humadteb. <sup>14</sup> Nadi  
Jesus Kristusnu ehanitak okai, Nug ig hamu megte  
amu Kayaknu oo mauhak, nuhig Oudinuu oo mak  
ele amu ag oh ahilagpa dayeg!



**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 3 Mar 2023 from source files dated 9 Oct 2020

ed374bb9-d819-53d1-a85b-f86cce3892e1